

Kata Bukan Perintah yang Berfungsi Perintah

Oleh AHMAD MUAZ AHMAD KHAIR

Makna perintah tidak hanya dinyatakan dengan ayat perintah, malah dapat dinyatakan juga dengan ayat yang lain, baik secara langsung maupun tidak langsung.

Analysis ayat dapat dilakukan dengan dua cara, iaitu dari sudut tatabahasa dan wacana. Analisis ayat berdasarkan tatabahasa melihat ayat di luar konteks ayat itu digunakan, manakala analisis ayat dari sudut wacana memerlukan kehadiran konteks semasa ayat itu digunakan.

Huraian ayat perintah dalam buku tatabahasa berdasarkan makna sintaksis yang bersifat bebas konteks. Hal itu bermakna bahawa pembahagian ayat perintah berdasarkan kata perintah yang terdapat dalam ayat perintah tersebut. Oleh itu, ayat perintah dibahagikan kepada beberapa jenis, seperti ayat suruhan, ayat larangan, ayat silaan dan ayat permintaan. Misalnya, kehadiran perkataan **jangan** akan menerbitkan ayat larangan, penggunaan perkataan **minta** atau **mohon** mewujudkan ayat permintaan, manakala perkataan **sila** menghasilkan ayat silaan.

Dalam penggunaan bahasa sehari-hari, perintah tidak hanya diucapkan dengan menggunakan kata perintah, tetapi dapat juga diungkapkan dengan cara yang lain. Dalam konteks situasi ujaran tertentu, seseorang dapat memerintah dengan atau tanpa menggunakan kata perintah. Misalnya:

- Guru: (1) Saya akan mengajar kamu bahasa Melayu.
 (2) **Mudah-mudahan** kamu semua boleh mengikuti pelajaran ini dengan baik.
 (3) Saya **harap** kamu memberikan perhatian semasa saya mengajar.
 (4) Saya **mohon** kamu juga memberikan tumpuan kepada subjek yang diajarkan oleh guru lain.

Daripada ujaran guru tersebut, perintah yang diberikan oleh guru kepada pelajarnya diujarkan dengan pelbagai cara. Perintah dalam ayat 2 merupakan

permintaan atau harapan yang diucapkan secara tidak langsung dan halus melalui perkataan **mudah-mudahan**. Perintah dalam ayat 3 dan perintah dalam ayat 4 merupakan permintaan langsung oleh guru terhadap pelajar dengan menggunakan perkataan **harap** dan **mohon**.

Kata kerja yang tertentu dapat berfungsi sebagai perintah jika memiliki makna perintah, seperti memaksa, menyuruh, mengajak atau meminta seseorang untuk melakukan sesuatu. Dengan hal demikian, ada kata kerja yang tertentu yang boleh menjadikan sesuatu ayat itu sebagai ayat perintah. Dalam bahasa Melayu, sering didapati ayat perintah yang hanya terdiri daripada satu patah kata kerja. Intonasi dan konteks membolehkan pendengar mentafsirkan kata kerja tersebut sebagai perintah atau tidak. Misalnya:

5. Duduk.
6. Pergi.
7. Minum.

Selain dalam bentuk satu kata sebagai perintah, kehadiran akhiran -kan juga menjadikan kata yang dilekatilah akhiran itu membawa fungsi perintah. Misalnya:

8. **Berikan** buku ini kepada Ali.
9. Buku itu mesti **diberikan** kepada Ali.

Ayat 8 merupakan perintah kerana fungsi akhiran -kan mendukung makna perintah. Ujaran tersebut boleh diubah untuk menjadi ayat pernyataan, seperti ayat 9, tanpa perubahan makna ayat.

Perintah yang mengandungi permintaan dapat ditandai oleh pemakaian kata **cuba**, dan penggunaannya

memperlihatkan ciri kesantunan. Ketiadaan kata **cuba** akan menjadikan permintaan itu sebagai bentuk perintah langsung. Kata **cuba** dapat bertukar ganti dengan kata **tolong** bagi melembutkan permintaan. Misalnya:

- 10a. **Cuba** selesaikan latihan itu.
- 10b. **Tolong** selesaikan latihan itu.
- 11a. **Cuba** angkat tangan.
- 11b. **Tolong** angkat tangan.

Perintah dapat diungkapkan dengan menggunakan kata bantu, seperti **boleh**, **mesti**, **hendak**, **dapat**, **ingin** dan **mahu**. Kata **boleh** dalam ayat yang berikut menunjukkan perintah yang mempunyai komponen makna "keizinan" dan "permintaan". Penggunaan perkataan tersebut boleh dalam bentuk ayat penanya atau ayat tanya. Contohnya:

12. Kamu **boleh** keluar sekarang.
13. **Boleh** saya bersihkan dulu tempat ini?

Apabila kata nafi **tak/tidak** diletakkan di hadapan kata **boleh**, makna permintaan itu bertukar kepada perintah yang berupa larangan tidak langsung. Selain itu, frasa **tidak boleh** itu dapat bertukar ganti dengan kata **jangan**.

- 14a. Awak **tak/tidak boleh** buat begitu.
- 14b. Awak **jangan** buat begitu.
- 15a. Pelajar **tak/tidak boleh** meniru.
- 15b. Pelajar **jangan** meniru.

Perintah yang merujuk kemestian atau kewajipan diungkapkan dengan penggunaan kata **mesti**, **harus**, **hendak** dan **hendaklah**. Penggunaan kata itu agak tegas kerana seseorang tidak diberi pilihan dalam membuat sesuatu yang diharapkan terhadapnya. Walau bagaimanapun, kehadiran partikel -lah mengurangkan sedikit ketegasan tersebut. Misalnya:

Kata kerja yang tertentu boleh menjadikan sesuatu ayat itu sebagai ayat perintah. Dalam bahasa Melayu, sering didapati ayat perintah yang hanya terdiri daripada satu patah kata kerja.

16. Awak **mesti** datang petang ini.
17. Semua pelajar **harus** segera pulang ke rumah.
18. Itulah sebabnya saya **hendak** awak memberikan perhatian.
19. Semua orang **hendaklah** duduk di tempat masing-masing.

Dalam ayat 18, jika kata **hendak** digunakan, subjek ayat ialah penutur, manakala **hendaklah** dalam ayat 19 merujuk pendengar.

Kata bantu **dapat** boleh menjadi perintah dengan maksud permintaan. Lazimnya, fungsi permintaan diungkapkan dengan ayat tanya, sama ada tanpa ataupun dengan partikel -kah sebagai perintah tidak langsung, dan permintaan tersebut bersifat halus. Contohnya:

20. **Dapatkan**kah awak datang petang nanti?

Perintah dengan fungsi kehendak dapat dinyatakan dengan menggunakan perkataan **ingin**, **mahu** dan **hendaklah**. Makna kehendak merujuk perbuatan yang belum berlaku. Misalnya:

21. Saya **ingin** tahu akan sebab Ali tidak datang semalam.
22. Saya **mahu** awak semua menyiapkan latihan itu cepat.
23. Ubat ini **hendaklah** diminum mengikut jadual.

Ayat silaan biasanya diungkapkan dengan menggunakan kata **sila**. Namun begitu, persilaan dapat juga diujarkan dengan menggunakan perkataan **biar** atau **biarlah** bagi menunjukkan keizinan. Misalnya:

20. **Biar** saya bawa buku itu, cikgu.
21. Jangan ganggu Salman. **Biarlah** dia menyiapkan kerjanya dulu.

Oleh itu, banyak kata atau bentuk ayat yang dapat digunakan dalam menyampaikan sesuatu maksud dalam komunikasi. Dalam kegiatan percakapan sebenar, makna perintah tidak hanya dinyatakan dengan ayat perintah, malah dapat juga dinyatakan dengan kata yang tertentu atau ayat yang lain, sama ada secara langsung ataupun tidak langsung. **PB**